

# Exportacion di banana pa Europa por ta un preocupacion di un Parlamentario di Aruba?

Democracia ta nos preocupacion di mas grandi

ORANJESTAD(AAN) -- Tico Croes di AVP a duna di conoce na DIARIO cu tin un dicho ta bisa cu grandura di bo mentalidad semper ta worde refleha den locual bo ta pensa y locual bo ta bisa, aunque cu mayoria di biaha ta cumbinibo di no expresa locual bo ta pensa pa ningun hende siña conoce grandura di bo mentalidad.

El a bisa cu ya ta na varios ocasion cu e ta haye obliga di reacciona riba ponencianan y delcaracionnan di Parlamentario Rudy Croes pa motibo cu of e kier falsifica historia of e no ta compronde de que se trata. Personalmente Tico Croes ta kere cu Rudy Croes no ta compronde de que se trata.

El a sigui bisa cu ta straña tur hende cu Rudy Croes ta worde delega door di MEP pa acudi na conferencianan practicamente insignificante pa Aruba, por ehempel esun cu el a caba di

bishita na Puerto Rico, mientras cu ora Promer Ministro bay Washington e no mag bay, pero su ruman si y ora Ministro Nicolaas a bay Canada pa negocia asuntonan di Setar pa Gobierno, Benny Nisbet si a bay.

Segun Tico Croes, esaki ta e trato cu e Gobierno di coalicion ta dunando e "votegetter" di mas grandi di MEP. Awor tur hende ta puntra ta pa kico?

Wel, pa cuminsa nan a siña conoce su mentalidad; no ta importe unda e carioa ta bay, pero e ta bula aden basta e carioa ta core. E mes segun Tico Croes no ta comprende con ridiculo e ta haci su mes ora e bin conta cosnan importante pe, pero insignificante politicamente.

Tico Croes a señala cu un contradiccion grandi nan ta considera e hecho cu Rudy ta bisa: "E schets di Ministro Hirsch Ballin a worde compila despues

cu el a yega na un acuerdo cu Gobierno di Aruba pa traha riba un Mancomunidad Constitucional. E resultado di su schets tin hopi peliger pa nos futuro identidad pero e tin ingredientenan cu por yega na un mancomunidad sui generis constitucional".

Un poco mas ley den su declaracion segun Tico Croes e ta bisa: "Mi a denuncia e hecho cu awor Hulanda kier retrocede y bin cu un sistema neo-colonialismo".

Tico Croes ta puntra: "Si e schets cu Ministro Hirsch Ballin a traha ta basa riba e nota di Gobierno di Aruba, ta con por ta posible cu e tin peligranan aden? Esey kiermen ta e nota di Gobierno di Aruba tabata contene e peligranan aki anto.

Hecho ta cu e schets di Ministro Hirsch Ballin no ta nada otro cu e Status Aparte cu AVP ta boga pe y ta sigur tambe cu

henter e pueblo di Aruba kier.

Segun Croes, ora cu AVP a worde puntra si por tin algo contra pa yema e schets Mancomunidad Constitucional, a expresa cu AVP no tin nada contra pasobra pa AVP ta e contenido ta bal y no e number.

Ademas segun Croes, AVP no tabata tin nada contra pa yuda MEP trata di scapa su cara, pero sigur no bin pretende awor cu locual Ministro Hirsch Ballin a traha tabata locual Gobierno tabata kier, pasobra e no ta contene e independencia cu Rudy a papia di dje na Ecuador ni na Puerto Rico. E ta contene locual cu e nota di AVP ta bisa, esta cu pueblo di Aruba tin e derecho pa dicidi sea cu Aruba ta mantene su Status Aparte manera nos tinea awor aki cu tur e derechonnan (pasaporte, nacionalidad etc.) of bira independiente manera Surinam locual cu MEP, PPA y ADN ta desea.

Croes a señala cu straño cu Rudy no sa cu tur partido na Puerto Rico a acepta cu lo tene un referendum pa e pueblo Puertorriqueño dicidi a base di su derecho di autodeterminacion si e ta keda cu Merca of e ta bira independiente.

E ley pa e referendum aki ta traha caba y tur partido di Puerto Rico a bay di acuerdo cune. Pesey ta straña AVP e expresion di Rudy cu: "Merca ta hincando placa na abundancia den Puerto Rico pa evita cu nan ta scoge pa ser Latino Americano".

Segun Croes, ta na Aruba ainda ta bringando pa e Gobierno di Rudy Croes realiza cu ta pueblo tin e derecho di autodeterminacion y no Gobierno. Te e mesun sagrado di autodeterminacion aki Rudy kier nenga pueblo.

Croes a enfatisa cu a bira tempo pa cada Parlamentario realiza cu nan tarea ta Aruba y cu mester por compronde locual kier y ta desea.

Cu Dominica y Santa Lucia ta preocupa cu nan exportacion di

banana pa Europa ta problema cu nan Parlamentarionan y nan Gobiernonan mester resolve. Segun Croes, nos tin suficiente problema na Aruba cu ta grita pa solucion.

Ta straña AVP masha hopi cu Rudy ta preocupa cu politiconan di Haiti ta worde golpea pasobra nan ta bringando pa democracia, mientras na Aruba democracia ta worde trapa tur dia especialmente door di e Ministro di Justicia cu ta su ruman Hendrik.

Croes a sigui bisa cu laga nos no bay busca falta di democracia na Haiti, siendo cu den nos mes lugar anarquia y nepotismo ta tumando lugar.

Ta parce cu Rudy no conoce e historia di van Wijland, di dr. Hermans, di Harbour Town, di La Cabana di e pamfleta di MEP den cual a caba cu e imparcialidad di nos Jueznán y di tur e empleadonan publico y comerciantenan cu a worde persigui door di su ruman.

E integrantenan di e partidonan Social Democra sigur ta completamente na altura kico a pasa cu e Turco cu a worde secuestra na Aruba, poni riba avion mientras cu Ministro di Justicia a duna orden na Inmigracion pa e no por drenta bek y tambe di Demihnan cu a worde saca di Aruba. Que hubo di e expresion di Hendrik Croes na Hulanda cu si e prison nobo tabata cla lo el a hinca e trahadornan den dje.

Croes a enfatisa, no bay hinca cabez den tera na Puerto Rico manera avestruz y kere cu na Aruba bo por ripitie y pueblo lo acepte. Por ultimo Croes a puntra: "Kico ta e interes cu Ministro Hendrik Croes tabata tin ora el a duna orden pa un cierto narcotraficante worde libera, mientras otronan cu tabata den mesun situacion cune si mester a keda sinta nan castigo". Pueblo kier un contesta.

Segun Croes, exportacion di banana no ta nos preocupacion, democracia ta nos preocupacion di mas grandi.

Diario . - (8 mei 1990)